

**Thermas Ferinas atque Zellenses physcio medice consideratas ... /  
submittit J. Gaertner.**

**Contributors**

Gaertner, Joseph, 1732-1791.  
Zeller, Johann.  
Universität Tübingen.

**Publication/Creation**

Tübingen : A.H. Roebel, 1729.

**Persistent URL**

<https://wellcomecollection.org/works/m5rkeh4a>

**License and attribution**

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection  
183 Euston Road  
London NW1 2BE UK  
T +44 (0)20 7611 8722  
E [library@wellcomecollection.org](mailto:library@wellcomecollection.org)  
<https://wellcomecollection.org>



ASSISTENTE DIVINI NUMINIS GRATIA,  
 JUSSU ET AUTORITATE  
 AMPLISSIMÆ FACULTATIS MEDICÆ  
 IN ALMA HAC EBERHARDINA,

P R Æ S I D E

*VIRO ILLVSTRI ATQVE EXCELLENTISSIMO,*

DN. JOHANNES ZELLERO

MED. DOCT. PRAXEOS ANATOM. & CHIRURG.

PROFESSORE ORDIN. SERENISS. DUCIS WURT. atque  
 PRINCIP. OETING. CONSILIARIO & ARCHIATRO, UTRIUS-  
 QUE & FACULTATIS & ARCHIATRORUM COLLEGII  
 SENIORE VENERANDO,

*PROMOTORE atque PATRONO PIE COLENDO,*

THERMAS

FERINAS <sup>ATQVE</sup> ZELLEENSES

PHYSICO MEDICE CONSIDERATAS,

PRO LICENTIA

OBTINENDI SUMMOS IN ARTE MEDICA HONORES  
 ET PRIVILEGIA DOCTORALIA,

*PVBlico & SOLENNI ERVDITORVM EXAMINI SVBMITTIT*  
 AUTOR

JOSEPHUS GÆRTNER, Calvensis.


*Die XX. Junii, Ann. M DCC XXIX.*

In Aula Nova.

T V B I N G Æ,

LITTERIS ANTONII HENRICI ROEBELII.







*ILLUSTRISSIMO AC EXCELLENTISSIMO*  
*DOMINO COMITI,*  
**DOMINO**  
**FRIDERICO**  
**GUILIELMO,**  
*SACRI ROM. IMPERII*  
**COMITI**  
**DE**  
**GRÆVENIZ,**  
**DOMINO HÆREDITARIO IN**  
**SCHILDE, WASCHAU ET**  
**DODAU, &c.**  
**DYNASTÆ IN MARSCHALKEN-**  
**ZIMMERN, ALBOECK, BURGOESCH,**  
**HEIMSHEIM ET PEROUSE.**  
*ORDINIS AQUILÆ NIGRÆ BORUSSICÆ*  
**EQUITI,**



SERENISSIMI AC POTENTISSIMI  
DUCIS WURTEMBERGIÆ  
PRIMARIO STATUS ET ADMISSIONIS  
INTIMÆ MINISTRO,  
*EFJUSDEMQUE*  
AULÆ MARESCHALLO  
SUPREMO,  
GUBERNATORI  
COMITATUS MONTISBELIGARDENSIS,  
SATRAPÆ  
URACENSI, PFULLINGENSI, NURTINGENSI  
AC NEUFFENSI. RELIQ.  
*COMITI ATQUE DOMINO SUO*  
*GRATIOSISSIMO,*

HOC STUDIORUM SUORUM SPECIMEN CONSECRAT,

ET AD EXTEROS ABITURIENS EA, QUA DECET, HUMILLIMI  
ANIMI SUBMISSIONE

TANTI MINISTRI PERENNATURÆ GRATIA  
SE SUOSQUE COMMENDAT

JOSEPHUS GÆRTNER, MED. LIC.





## Q. D. B. V.

**P**ostulant ab artis salutaris Candida-  
to Statuta GRATIOSÆ FACUL-  
TATIS MEDICÆ, ut exantlatis  
examinibus, disputationem quoque habeat  
solennem, adeoque profectuum suorum spe-  
cimen edat publicum. Huic instituto pror-  
sus laudabili & ego morem gerens, circum-  
spicere cœpi atque animo volutare meo,  
quodnam ex amplissimo Medicinæ campo  
thema seligerem, intentioni huicce meæ con-  
gruum. Deliberanti autem primo statim  
loco succurrit præsens anni tempus, quo ad  
Aguas Medicatas, & inprimis quidem Bal-  
nea, vel jamdum properare, vel se suum-  
que



que corpus tamen præparare incipiunt multi. Cum verò in ea semper fuerim sententia, pudori utique Juveni ducendum, & vagabundi atque minus considerate agentis animi signum esse, si quis domi peregrinus, atque domesticarum rerum incurius vel negligens fuerit: Ex historia Patriæ Nostræ Naturali, quæ, si unquam ullius alterius Provinciæ, plenior conscribi mereretur, *vicinas Calva* meæ, longe lateque celebres, selegi *Thermas FERINAS atque ZELLEENSES*, bona spe fretus, thema fore non mihi saltim atque anni temporis sic satis accommodum, sed & Medica consideratione non indignum. *Faxit modo Divina Bonitas, ut omnis labor meus succedat feliciter!*

§. I.

**P**ROSPexit Patriæ Nostræ de subsidiis Naturæ, etiam Medicis, Auctor ejusdem TER OPTIMUS TER MAXIMUS satis liberaliter, atque fontes medicatos ipsi dedit bene multos. Habemus *Acidulas Deinacenses* dudum celebratissimas, a *Leporino* quondam descriptas, & nuperime sub *Illustr. Dn. D. Zelleri*, Promotore ac Patrono meo per omnem vitam submisisse colendo, publica disputatione



tione *Dn. D. Gmelini*, commendatas. Has pone ſequuntur *Gæppingenses*, quarum descriptionem præter *Tabernæmontanum*, *Walchium* & *Maskoski*, dedit nobis etiam *Exc. Dn. Archiater Lentilius*. Accedunt *Engſtingenses*, raro exemplo in ipsis alpiſus excelsis ſcaturientes, quas *Jebenhuſanis* non minores eſſe, atque virtutibus nihil omnino cedere, quondam pronunciavit *Wielandus*, recentiffime autem peculiari Diſput. Academ. propoſuit Magn. Univerſitatis noſtræ Rector *Dn. D. Alexander Camerarius*, Præceptor meus ac Evergeta tenerrimo animi affectu Parentis loco venerandus.

## §. II.

Acidularum plures ſunt, utut non omnes de Ducatu noſtro, in ipſo tamen, vel ad fines modo Patriæ, propinqui, noſtris minime ignoti. Sic ad fluvium *Fils*, non procul à *Gæppingensibus*, ſunt *Jebenhuſana*; & altius ad illum ipſum fluvium *Überkingenses*. Ad *Nicrum ſuperum* ſitæ vix milliari *Tubinga* diſtant *Nidernovenses*, de quibus publica proſtat diſputatio B. *Dn. D. Rud. Jac. Camerarii*, ultra quas ad eundem tractum, vix trium horarum ſpatio comprehenduntur, præter balneum in *Obernau*, de quo adhuc ſuperest *Judicium* à *Facultate Medica Tubingensi* quondam datum; Et *Sulzaufenses*, quæ ante biennium ex occulta, & vicinis hætenus ignota, cauſa ſimul & ſemel quaſi effœtæ Spiritum amiſerunt omnem, ut aqua modo ſuperellet dulcis, viva quidem, atque potui idonea, parciſor tamen uſque, ſi non proxime tandem penitus emanſura; *Bieringenses*, *Boerſtingenses*, atque *Imnavienses*. Et in medio *Sylvæ nigræ*, atque itinere *Argentoratum* verſus, ſunt *Rippelsavienses* (de qui-



bus in transitu notandum, quod hæ sint ille ipse fons *in dem Kinzinger Thal*, cujus in dissp. d. Acid. & Therm. rat. ingred. & vir. conven. §. XV. p. 24. Ill. Fr. Hoffmannus, & ex hoc Exc. Dn. D. Verdries, in sua Physica, edit. ult. p. 399. meminit, qui postquam longo tempore fluxerat, omni sapore ac virtute subito fuerit privatus, eam ob causam, quod vicinis in locis facta rupium apertura vapor sulphureus & mineralis magno impetu eruperit, clausa vero apertura vires pristinas de novo acquisiverit.) *Griesbacensis & Petrina* scaturigo acida, una cum balneo non procul disto *Antegast*. Quemadmodum de his posterioribus legi inprimis merentur, ex antiquis quidem *Salzmannus & Grafeccius*, ex recentioribus autem *Exc. Dnn. DD. Bæcleri Argentinenſis*, & *Hurteri Scaphusienſis* Mſtum examen per reagentia cum istis fontibus institutum; Sic occasione peculiaris istius phœnomeni, quod nupero demum anno cum commilitonibus vidi apud *Illustr. Dn. D. Al. Camerarium*, scilicet aquam *Rippelsavienſem* atque *Petrinam* cum gallis jucundam purpuræ rubedinem cito contraxisse, (quod ipsum quoque in *Bieringenſibus* supra citatis observari, fide gratiosi Dn. Hospitis mei assevero) non possum non gratulari Patriæ, & ægrotis, qui aquis inter nos indigebunt ferrugineis, multum boni promittere, de *nova scaturigine*, quæ ad ipsam *Nicri ripam, Stuttgardiam inter & Canſtadium*, superiori demum anno inventa est; quippe ejus portio, *Tubingam* transmissa, cum gallis cito non rubedinem modo, sed plenam brevi nigredinem induit. Enim vero etiam *Hattenhovenſis* aqua, *Joh. Bauhano in d. Font. Admir. Bollenſi* jam citata, huc similiter transmissa, non minus egregiam purpuræ rubedinem exhibuit.



§. III.

Ex Aquis vero Medicatis ad balneandum inservientibus primo utique loco stant *Therma* nostræ *Ferina*, etiam *Bernh. Varenio* in *Geographia Generali* laudatæ, vel ex prisco *Widmanni* ante duo secula jam impresso, & recentiori Pastoris quondam ibi *Deuceri* in vernacula scripto tractatu, omnium tamen maxime annua plurimorum ægrotorum visitatione, & felici eorundem restitutione dudum celebres. Duobus milliaribus inde distant *Zellenses*, laud. *Varenio* l. c. edit. *Newton*. etiam nominatæ, & a *Mart. Rulando*, nec non *Joh. Georg. Agricola*, item *Andr. Baccio*, in suo de thermis tractatu, aliisque quondam descriptæ. His ad latus poni meretur *Fons* quondam *Admirabilis* dictus *Bollensis*, hodiernum præstans adhuc & elargiens, quod de ipso quondam prædicaverat *Johannes Bauhinus*. Fontem *Bollensi* non dissimilem, quippe similiter sulphureum, *Zaisenhuse*, ad fines Patriæ versus Palatinatum, ab aliquot lustris scaturientem atque celebrari cœptum, publico stitit Medicus Provincialis *Dn. D. Brigel*, nec minus laud. Illustr. *Dn. D. Alexander Cameraarius* in dissertatione sua pro Licentia. Huic similem, in agro vicinæ Imperialis *Reutlingæ* inventum, videsis in *Eph. Nat. Curios. Cent. III. & IV. Obs. 133*. Et eidem junge alterum *Bahlingæ*, præcedentibus ratione sulphuris prorsus similem, a nemine, quantum mihi quidem constat, hætenus descriptum. Balneum *Tubingæ* proximum, *Divo Blasio* quondam dicatum, a citato *Varenio* aquis natura calidis, adeoque thermis proprie ita dictis, falso adscriptum, vel ex *Sam. Hafenrefferi* edito tractatu, magis tamen & recentius ex Disp. pec. B. *Dn. D. Rud. Jac. Cameraarii*



*rarii*, atque annuâ ægrorum ex vicinia undique confluentium visitatione, celebratur.

§. IV.

Taceo *Canstadiensium* aquam ab *Exc. Archiatro Lentilio* in laud. *Eph. Nat. Cur. Cent. I. & II. obs. 149.* descriptam; *Welzheimenses* thermas a *Rumelino* quondam traditas; *Marpacensem* fontem ab *Eisenmengero* (qui *Siderocratem* se vocavit postea) descriptum; *Capfenethensem* in *Andreanis Se-lenianis Augustal.* ad ann. MDCLXVI. graphice depictum. Et coronidis loco *Nagoldensem*, a paucis modo annis celebrari cœptum. Ex his aliisque (non enim omnes omnino patriæ medicatas aquas hic exhausimus) nos hac quidem vice seligemus *Thermas Ferinas*, illisque vicinas jungemus *Zellenses*, in utriusque fontis originem, contenta atque facultates, paulo specialius inquisituri.

§. V.

Quod ergo ad *Thermas Ferinas* attinet, sunt illæ ex antiquissimis fere, & prætenduntur a *Deucero* inventæ anno post reparatam a Christo salutem ducentesimo duodecimo, creditæ quondam *Heroldo* comprehensæ sub *Aquis Marcianis* in genere ita dictis, scil. in Sylva tum *Marciana*, post *Hercynia*, nostris hodie *Nigra* dicta sitis, & *Imperatori Caracallæ* æque ac *Badenses* *Marchionatus* jam cognitæ, prouti occasione epigrammatis antiqui in *Thermis Badensibus*, olim *M. Aurelii Antonini* dictis, conspicui, & a *M. Crusio Suev. Annal. L. IV. P. I. p. 91.* adducti, *Kufferus* autumat. Prima ejus inventio hætenus communi omnium consensu tribuitur *Apro*, cujus figuram lapidi incisam adhuc exhibet ædificium balneo superstructum,



ctum, proin etymologiam, cur Thermæ vocentur Ferinæ, omnium optime declarat. Thermarum vero nomen atque dignitatem utique tuetur mereturque fons, a totidem seculis inexhaustus, & *equali calore jugiter scaturiens*, & hunc quidem adeo moderatum servans, ut in proverbium inter nostros abierit, atque res promiscue omnes, quibuscunque usibus accommodæ, dicantur *eben recht wie das Wildbaad*.

§. VI.

Notabilis hic primo statim loco occurrit circumstantia, ulteriore curiosorum atque in his rebus versatorum inquisitione dignissima: Prætensum quondam fuit, Thermas in Marchionatu *Badenses*, & *Ferinas* atque *Zellenses* nostras, unam eandemque esse scaturiginem. Quod ipsum probaturi solent ad duo inprimis provocare phænomena: I. Situm, prouti quidem ex Mappa Patriæ Geographica patet, adducunt parallelam, aut potius quasi rectilinam & æqualem fere singulorum fontium à semet invicem distantiam. Deinde distinctum adeo caloris gradum notant; scil. dum *Badenses* fervidæ scaturiunt, *Ferinæ* mediocriter calent, *Zellenses* autem in fundo saltem aliquid caloris servant, in universum tepidæ, calefieri pro balneo necesse habent.

§. VII.

Quicquid autem hujus rei sit, admirandæ scaturigo nostra est & ubertatis & constantiæ, quæ non modo in quatuor quasi distinctis cellis, seu areis saxosis, sed arenâ pro commodiore infessu opertis, admodum spatiosis, quippe pro diversitate ædificii nunc 12. nunc 30. nunc plures nunc pauciores pedes ambitu quadrato æquantibus, pro insigni



etiam simul balneantium numero sufficit; verum etiam calorem suum temperatum, æque ac divitem aquarum suppellectilem, semper servat æqualiter, adeo, ut hominum memoria non constet, unquam vel defecisse aquas per annorum siccitatem quantumvis extraordinariam, vel remisisse a calore suo, tantum abest ut congelatæ fuerint vel rigidissima etiam hyemæ, qualis sine pari dicebatur olim illa anni 1709, nunc etiam nostri quem adhucdum vertimus anni. At enim vero in spatiosa illa area, quæ virorum balneo destinata, scatariginum tamen aliqualis ratione caloris quidem observatur diversitas, dum quædam ex interioribus, reliquas anteriores caloris gradu superantes, etiam inferni nomen inde reportarunt, nostratibus *die Hölle* dictæ, absque tamen eo, ut ad plenum fervorem accedant, vel cuti aut cuticulæ saltem ardore suo quidquam noxæ afferant.

§. VIII.

Nihil ullibi comparet colorati, *nulla ochra* deponitur, nec in fundo scaturiginum, nec ad latera, aut in superficie vel parietum & quasi conclavium, vel canalium per quos aqua defluit superflua; *Nec* deprehenditur *spuma* vel cuticula aut quicquam aliud in superficie puteorum atque scaturiginum totidem circumnatare vel colligi; Sed est alveus modo dives aquæ calidæ, limpidæ, tam naribus *inodora*, quam ori *insipida*, nisi quod quasi *unctuosi* aut *pingue* quidpiam videatur offerre bonis aquarum dijudicatoribus aquæ hujus nostræ mollities. Scaturiunt ita Thermæ nostræ in amœna valle, quam perfluit amnis, *die Enz* dictus, Nicro nostro & cum hoc Rheno aquas invehens suas, ceterum bene vivas & laudabiles, quippe truttis divites



divites. Et suppetunt per oppidum passim fontes aquæ, utut non medicatæ, potui tamen atque usibus culinariis perquam aptæ, nec de calore thermarum participantes quidquam. Ubi quidem hac occasione nec hoc prætermittendum esse arbitror: Cellas subterraneas vinarias in diversoriis (quorum hic multa sunt & ampla, atque recipiendis advenis prorsus accommoda) æque ac ædibus per civitatem reliquis esse bene frigidas & siccas, adeoque vino ibi ad & conservando quam maxime idoneas, neque tam propinquum calidæ scaturientis alveum arguentes. Ad utrumque vero latus montes sunt excelsi, densa arborum coniferarum fronde eminus adeo nigricantes, ut *Sylvæ nigræ* nomen dederint, plantarum salubrium æque ac ferarum & volucrum feracissimi.

### §. IX.

*ZELLEENSES* vero Thermarum quidem nomen sensu adeo rigoroso non tuentur, cum in labro balneantes soleant sedere, & calefieri prius aqua debeat. Nilominus aqua utriusque putei non est plane frigida, sed *tepida*, & fide Thermometri Florentini parvi decem gradibus calorem aeris externi superat, quin imo sub repurgatione puteorum subtus in fundo deprehenditur plene *calida*, ut balneo absque ulteriori calefactione sufficeret, prouti jam olim hoc notavit quoque *Rulandus*. Huic igitur a vicino oppido *Zell* nomen, situs autem est ad fluvium *Nagold*, in latiore, proin tanto etiam amœniore valle, nec dum tamen extra fines *Sylvæ* prius dictæ *nigræ*. Sunt autem *duo* inprimis *putei*, aliquot centenis passibus ab invicem distantes, quibus totidem ædificia, ad recipiendos advenas idonea ac bene spatiosa, sunt superstructa;



In his aqua non cum stridore vel strepitu, sed placide prorsus scaturit, continuo aliquas aeris eructans bullas, tota *limpida, inodora*, ut prior, & *insipida*, replendis tamen labris quamplurimis abunde sufficiens, cæterum, ut de Ferinis supra diximus, sua etiam *constantia & antiquitate* se commendans. Et cum omni tempore fuerint, qui in liberiori spatio balneare volentes labris istiusmodi noluerunt includi, adeoque hoc ipsum jugiter in Zellenfibus desiderarunt, superiori demum anno, munificentia *SERENISSIMI PRINCIPIS NOSTRI, Excellentissimus Prasfes meus, Illustr. Dn. D. Zellerus* duo conclavia adaptari curavit, canalibus atque epistomiis ita instruxit, ut nunc in area quadrata sabulosa sedentes liberius balneare, & modo calidam modo frigidam, reserato saltem apertoque uno vel altero epistomio, pro indigentia admittere valeant. Cæterum utut neque hic *nihil* ullibi sponte sua *concreseat* quidquam, vel ad fundum subsideat, aut *ochra* quæpiam compareat; in *ahenis* tamen, queis tota die fervere aqua fere per æstatem integram affolet, *crusta* utique colligitur, & quotannis etiam decutitur, *tartareo*, si quidem ita loqui licet, *calcaria* vel tophacea. Etenim aqua, ignis vi fervere incipiens, *lactescit* quasi, & albicantis pulveris non parum dimittit, qui postea tractu temporis crustam illam subministrat, suo loco specialius declarandam & examinandam.

### §. X.

De *Origine Fontium* hic non agam ex professo; Sufficiat adduxisse verba *P. Lane* Mag. Nat. & Art. T. II. p. 185. *Fontium non eandem omnium esse originem, sed aliquos*



quos esse a pluviis, alios a liquatis nivibus, nonnullos ab aere, frigore densato & in aquam converso, plures etiam ab aqua, in vapores sublimata mediantibus ignibus subterraneis, originem suam ducere. Quod ipsum totidem verbis asserit, atque speciosis omnino exemplis confirmat, Exc. Dn. D. *Verdries* in *Phys. P. II. Cap. IV. §. VIII. p. m. 389. seqq.* Nec de *Thermarum origine* magna me sollicitudo tenet amplius, postquam & modo laud. Dn. D. *Verdries* & *Listerus*, *Bergerus* aliique cum ipso plures, dudum rejectis veterum de igne subterraneo flammante, de calce viva subterranea, de solis per globi corticem penetrantis efficacia, & similibus figmentis, incalescentiæ causam quæsierunt in conditione terrarum, quas aluunt aquæ & perfluunt; prorsus conformiter illis, quæ in *Histor. suæ Natural. L. XXXI. cap. IV.* scripsit quondam *Plinius*: *Tales sunt aquæ, qualis terra, per quam fluunt.*

§. XI.

Scilicet *Pyritas* germinantes eorumque mineras thermarum inprimis parentes & quasi confectores esse, unanimi fere omnium consensu Recentiorum plerique omnes contendunt. Quemadmodum enim ex cursu *Chymico Dni. Nicolai Lemery* notum est experimentum sulphuris, cum *Limatura ferri* commixti, & humectati, brevi admodum adeo incalescentis, ut & vasa disrumpat, & in flammam tandem erumpat ipsam; Sic *Pyritarum* venæ subterraneæ, (sed ferro inprimis atque sulphure pyritas constare, notum est vel ex vitriolo martiali, quod pararunt olim vicini *Reutlingenses*, testimonio disputationis d. *Acidulis Engstingensibus*; nec non ex sulphure, quod adhucdum ex eisdem paratur non procul a Mona-



sterio Laureacensi) in nostro Ducatu inprimis cumula-  
tæ, & admodum copiosæ, delato in ipsorum poros hu-  
more aqueo, quo nexus & compages sulphuris & ferri  
solvitur, ut illud in hoc agere possit efficacius, æstare  
incipiunt, mutuoque partium conflictu attrituque exar-  
descunt, proin aquam transluentem, vel transcolandam  
modo, vel calefaciunt saltim, vel etiam virtutibus im-  
buunt, in aqua nimirum liquescentes, & in ochram ha-  
litusque sulphureos diffuentes.

### §. XII.

Aperiretur nobis hic exspatiandi campus certe pa-  
tentissimus, & subministraret materiam scribendi amplis-  
simam ferax inprimis nostra Wurtembergia; sed non  
fert instituti ratio, prolixius hæc excutere, temporis et-  
iam angustia aurem nobis vellicat, & de aliis cogitare  
jubet. Hoc unicum tamen, quod paradoxum utique  
videri posset, prætermittere nefas foret: Et jam olim  
*Bauhini*, cum foderetur fons admirabilis *Bollensis*, &  
hiscæ nostris adhuc temporibus, tam ad modo dictum,  
quam ad & circa vicinum nobis fontem *Reutlingensem*,  
ingens est pyritarum copia, dum non modo globuli isti,  
figuris suis ex cubo & octaëdro insignes, & *Eph. Nat. Cur.*  
*Cent. III. & IV. Obs. 9. p. 15.* notati, passim ad agrorum  
margines atque rivulorum ripas occurrunt, sed & lami-  
na tali splendida marcasitacea obducuntur, quæ magno  
numero ibi occurrunt, ammonis cornua, asteriæ, entro-  
chi, lyncis lapides, conchitæ, cochlitæ & simil. Ne-  
que tamen aqua utrobique est vel sapida acidula, vel ca-  
lida thermalis. Quemadmodum ergo singularis utique  
est resolutio sulphuris, quæ nec acidum spirat, nec ab  
acido



acido præcipitatur, crucem forte figens Chymicis; Ita Physicis relinqui & commendari posset illa altera quæstio: Cur sulphurearum illarum aquarum nulla calida? An hoc quadret, quod laud. *Dn. D. Verdries* l. c. dicit, & explicatæ Acidularum genesi immediate subjungit, applicandum suo modo hic magis ad sulphur integrum, problema esto conflictui reservandum.

### §. XIII.

Scopo igitur propius accedens meo, atque medicarum magis rerum satagens, ad examen utriusque propero, perscrutaturus earundem contenta, atque deducturus inde virtutes ipsarum Medicas, plenam licet suscipiens magni laboris nec minoris difficultatis aleam, scil. ob multiplicem Auctorum dissensum. Etenim *Leonhardus Fuchs* Lib. II. *Institutionum* suarum dignas omnino nostras censuit, quas in Sect. V. Cap. XXVIII. inter balnea naturalia potiora recenseret. De Ferinis autem scribit: *Harum mistura ex copioso Sulphure, & exiguo Alumine constare fertur. Sunt tamen, qui Aeris, Salis & Nitri misturam accedere priori censent, atque hi recte judicant.* Et de Zellenfibz: *Earum mistura, inquit, ex Alumine, Aere & exiguo Sulphure, vel, ut quidam censent, ex Alumine & Aere tantum, constat.* Videtur quoad ferinas quidem thermas sua hæc fecisse, & in vernaculam saltem transluisse, *Deucerus* supra allegatus. Nec multum abludit inde *Kufferus*, qui in suo de Marchiobadensibus tractatu hisce ferinis nostris *Sulphur, Sal, cum Alumine & Vitriolo modico* tribuit; atque *Widmannus*: nisi quod hic prædominium *Sulphuri* tribuat, *Sal Nitrum & Alumen* subjungens, nec alia mineralia ab aliis inesse credita volens exclu-



excludere. Cujus tamen phœnomenum docimasticum geminum, sc. *lintea in Ferinis lota sulphur redolere, & aqua per destillationem abstracta sulphur remanere*, necdum nobis se probavit, infra suo loco ulterius forsan illustrandum.

#### §. XIV.

De Zellenfibus simile plerorumque fuit judicium. Sic in *MScrito* antiquo de Zellenfibus, æque ac citato supra *Rulandi* de iisdem tractatu, repetuntur modo verba *L. Fuchsii*, quibuscum conveniunt, quæ deprehenduntur in *J. G. Agricola*, saltem quod hic aluminis multum, æris vero atque sulphuris parum inesse statuatur. Dum contra *Baccius* in suo d. thermis tractatu, singulorum horum ingredientium parum utique inesse prætendat. *Ænea quoque*, inquit, *mistura (quanquam valde temperata) nec non Alumine cum modico Sulphure participantes, habent Helvetici aquas sub oppido Zell, prope Galbam.* Primæ huic & antiquissimæ omnium sententiæ succedat altera illorum, qui æri s. cupro ab antiquitate toties aquis modo dictis inesse credito, substituerunt *Martem*. Sic non modo *MScritum* illud antiquum, quod de Zellenfi balneo in multorum manibus versatur passim, *Mæglingio*, *Pforzheimensium* quondam Medico, tribui solitum (quod tamen parentis foetum esse, toties negavit filius, Archiater *Wurtembergicus* non ita pridem pie defunctus) præter Nitrum, Alumen, Calcem vivam atque Sulphur etiam *Martem* ipsi assignat; Verum etiam de *Ferinis* recentior quispiam solide doctus, atque rerum medico chymicarum peritus, per instituta examina edoctus, pronunciare non dubitavit, *subtilem Martem* atque *Terram Calca-*



*Calcariam* esse, quibus laudandæ infra qualitates debeantur. Neque tamen defuit Alius non minus celebris, qui in Ferinis quidem *metallici prorsus nihil*, *alcali* autem *volatile* in maxima copia, *Sulphur subtile* & *Nitrum* in minori, *Acidum* denique in minima copia deprehendi prætendit.

§. XV.

Quam bene igitur in hoc sententiarum divortio succurrit, & exoptatas mihi fert suppetias examen cum ipsis hisce aquis per Reagentia, institutum quondam sub directione Exc. Archiatri B. Dn. D. *Gerlachii*, (cujus Gener, Prænobiliss. Dn. D. *Weissmannus*, Nurtingensium nunc Physicus Meritissimus, alia insuper, ex B. Soceri Schedis excerpta, prorsus egregia, benevole mihi communicavit, eoque ipso publice etiam hic abs me laudari meruit) atque ita comparatum, ut conformiter desiderio Illustr. *Frid. Hoffmanni Observ. Physic. Medic. part. III. cap. 10. & seq.* omnium optime contenta aquarum detegere queat, adeoque huc transcribi mereatur integrum.

§. XVI.

Scilicet primo loco destillationi subjicere aquas sibi proposuerat, atque adeo ab unciis cxx. & alibi lxxx. aquarum tam Ferinarum quam Zellenium uncias xx. xxvj. xxxiij. prodeuntes obtinuerat, examinaturus postea tam aquam simplicem sibi relictam, quam destillatione ex alembico prodeuntem, ac tandem quoque illam in vesica superstitem. Qua occasione ante omnia notandum hoc erit phænomenon: Non contigit hic in nostrarum destillatione aquarum, quod observatum fuit in



**Acidulis Deinacensibus.** Dederant hæc in illo post destillationem residuo sedimentum insipidum, plus minus albicans, terreum, quod exsiccatum ex unciiis cxx. pondere gran. xvj. ex unciiis lxxx. vero granorum xii. deprehendebatur. *Nihil ergo quidquam sedimenti colligere ab utroque hoc balneo potuit, aquam modo in vesica superstitem leviter albescere observavit Noster, atque exiguum paucissimæ terræ calcariæ præsentiam inde conclusit.*

§. XVII.

Neque porro mutationem ullam vel reactionem observavit in aqua per destillationem obtenta, cum omnibus illis sigillatim mox recensendis reagentibus commixta, & sollicitè examinata; Quippe hæc tam Ferinarum quam Zellenium nec turbationem, neque effervescentiam, neque sedimentum, nec quidquam aliud exhibuit, sed vel *prorsus immutata* mansit, vel colorem admixti aut instillati liquoris saltim induit.

§. XVIII.

Neque tandem tertio ulla notatu digna observari potuit *differentia*, sicuti in Ferinis inter balneum *Principibus*, & illud alterum *Nobilioribus* reliquis personis destinatum, ita etiam in Zellenibus inter balneum quod dicitur *superius*, atque illud alterum *inferius* vocari solitum. Sumebantur autem, quod in transitu notandum, ampullæ vitreæ crystallinæ, quæ continebant aquæ drachmas tres, illisque instillabantur liquorum circiter guttæ sex.

§. XIX.

*FERINARUM* igitur aqua sibi relicta ab instillata *solutione aluminis* dilute opalescentem exhibuit colorem.

A de-



A destillatione residuum diu mansit immutatum, tandem leviter turbari & albescere cœpit.

*A Solutione Lune cupellata* statim insigniter opaluit, cum tendentia ad colorem ex bruno luteum, & lactescencia fortiori ac de Saccharo Saturni dicitur statim, atque præcipitatione tandem quasi grumorum lactis. Mora temporis passim ad nigredinem inclinare videbatur. Residuum quoque eodem prorsus modo sese habuit.

*Solutio Sacchari Saturni* opalescere fecit aquam illico, ut tamen desuper usque magis inclarescens iterum luteoli quidpiam exhiberet, ad fundum vero albi pulveris copiam dimitteret. Quod idem in destillationis residuo factum.

*Solutio Vitrioli Martis* in aqua balnei sibi relicta tardius, in altera vero post destillationem superstite citius, non tam turbari, quam potius floccos modo dare cœpit pallide luteolos. Quod ipsum etiam contigisse deprehendo ab instillata *solutione Martis*.

*Solutio Vitrioli Veneris*, atque *Veneris* ipsius, cœrulescere atque parum turbari fecit utramque aquam, tam naturalem sibi relictam, quam a destillatione superstitem.

*Solutioni Sulphuris cum calce viva* factæ, aqua prius concolor, dein turbidula, tandem fere graveolens fieri; a destillatione residuum mora temporis demum turbari parum cœpit.

*Solutio Resinæ* turbari & albescere fecit utramque, magis quam cum Aqua fontana id fieri quidem assolet.

*Syrupus Violarum* naturalem suum in aqua balnei servavit colorem. Superstes autem illa altera ignem experta aqua virorem ipsi contraxit in momento.



*Solutio Lacmi* nihil quidpiam rubedinis exhibuit, sed colorem modo conservavit suum, quin exaltavit eundem aqua post destillationem residua.

*Gallarum* frustra, etiam per noctem in aqua detenta, ne rubedinis quidem, multo minus nigredinis quidquam exhibuerunt, colorem modo infusi earundem ordinarium contraxerunt.

## §. XX.

*ZELLENSIUM* aqua ab *Aluminis* solutione prorsus uti prior sese habuit.

A solutione autem *Lunæ cupellatæ* opalescere modo, nec alius coloris quidpiam exhibere visa fuit.

*Saccharum Saturni* citam dedit lactescentiam, cum præcipitatione pulveris albicantis ad fundum.

*Vitriolum Martis* & *Mars* ipse in suis solutionibus nihil exhibuerunt, quod a phœnomenis in præcedente aqua dictis recederet.

Idem quoque dici debet de *Vitriolo Veneris* atque *Venerere* solutis.

*Solutio Scoriarum Reguli antimonii* luteum aquæ conciliavit colorem, absque tamen fœtore; a destillatione residuum plane non mutavit eam.

*Sulphur cum calce viva solutum* levem turbationem, lactescentiam atque fœtoris vestigia produxit. Residua tamen post destillationem aqua saltim turbata, olere quidquam deprehendi non potuit.

*Syrupus Violarum* prorsus ut in præcedente colorem suum ab aqua sibi relicta conservavit, virorem vero egregium bene cito ab altera destillationem experta & in vesica superstite reportavit.



*Gallæ* etiam hic mutationem nullam, sed ordinarium saltim infusi colorem produxerunt.

### §. XXI.

Quemadmodum igitur Phænomena huc usque proposita satis superque declarant, aquam nostram utriusque balnei, *neque martialem* aut ochream terram in mixtionem suam recepisse, prouti *Freyenwaldenses*; nec præter martiales particulas *Sal* aliquod *vitriolicum* habere, aut ab injectis gallis tingi, ut *Lauchstadienses*; neque *spirituosum* illud expansivæ admodum virtutis *elementum* vel solum, ut *Acidulæ* nostræ *Deinacenses*, vel cum *Salinis alcalicis* particulis conjunctum, ut *Egrana*, *Selterana* vel *Emsenses* aquæ; Nec tandem ad instar *Carolinarum* præter spirituosum Clementum, & sal alcalinum atque nitrosum, tanta *calcaria* & topheſcentis *terræ copia* abundare; Sed ad *Tæplices* Bohemiæ, *Hirschbergenses* Silesiæ, *Piperanos* s. *Fabarienses* Rhætiæ, atque nobis propiores *Schlangenbadenses* Hassiæ fontes potius accedere, adeoque *subtilitate* & *puritate sua* sese commendare: Ita facilis nunc parata nobis via est eruendi ex his ipsis qualitates & virtutes medicas, quibus pro fundamento semel positis, determinatu postea non erit difficile, quinam ægrotorum ad unum vel alterum balneum cum fructu possint ablegari, quid in utriusque usu prudenter instituendo debeat moneri.

### §. XXII.

Perparum enim profecto est, quod terreæ calcaris substantiæ in sinu suo continent, per experimenta prius adducta, e. g. Syrupi Violarum virescentiam, aliarum solutionum salino terrearum opalescentiam, declaratum;



Cui præter exiguum alicujus Sulphuris indicium, in Ferrinis a nigrescentia solutionis Lunæ petendum, accessit ultra mineralium ferè nihil, adeoque sistit aquam, qualem fere *Hoffmannus* declarat, vere dulcem, quæ omni sapore & odore caret, & incocta nihil sapidi relinquit, valde levis & ad naturam aquæ pluvialis vel destillatæ accedens, præter alia etiam abstergendis & lavandis linteis præ quibuscunque aliis conveniens.

§. XXIII.

Jam vero aquæ istiusmodi subtiles, non solum promte & intime etiam minima vasa atque poros subeunt, sed & facile per omnia emunctoria transeunt, neque minus ad dissolvendas partes mucidas crassiores, atque detergendas & è corpore evehendas partes impuras salinas, admodum idoneæ sunt. Præterea usu externo, duras & constrictas partes emolliunt ac relaxant, poros aperiunt, & liberiores sanguinis humorumque omnium adfluxum ad partes invitant, eoque ipso magna utique in medendo præstare possunt. Patebit hoc ex consideratione effectuum, quos incessus talis atque balneum calidum in corpus humanum exserit.

§. XXIV.

Primum enim calor iste modicus *expandit* sanguinem atque omnis generis fluida, vasorumque efficit dilatationem. Ab hac dilatatione sanguinis crescit pulsus, adeoque fortior & intensior fit circuitus, ut rubore tingantur partes superiores, & sudore tandem perfundi incipiant. Accedit insuper alia corpori mutatio, ab *ambientis fluidi gravitate*; aquam enim aeris gravitatem 800. vicibus superare notissimum est. Jam vero corpus nostrum,



nostrum, ex aere in aquam translatum atque hac undique circumfusum, magnam certe compressionis vim inde sustinet, qua præcipue sanguis a peripheria versus centrum, proin a cute ad Viscera & internas partes, magna vi urgetur. Concurrente sic ab extra quidem vasorum compressione, ab intra vero, propter sanguinem calore ad externas invitatum, majore eorundem dilatatione, velocior evadit partium sanguinem constituentium motus intestinus; quo mediante postmodum & humorum viscidorum dissolutio perficitur, & obstructions referantur, aptique redduntur humores, ut per secretoria & excretoria corporis organa melius trajiciantur. Ulterius balneum etiam considerandum est ut *humidum*, utut enim, quamdiu homo ita sedet in calida, superficies corporis ab aquarum pondere comprimatur, tamen ab earundem humiditate & calore ingens fibrarum ipsiusque cutis fit emollitio, ut balneo postea relicto habitus corporis admodum turgescat, relaxetur, vasisque dilatatis atque poris apertis uberior sanguinis ad superficiem corporis affluxus conciteretur, unde in lecto decumbentibus sudor modicus fluere solet, effectus a balneo desideratissimus, magnæque ad sanandum efficacix.

§. XXV.

Ab hac emollitione ac relaxatione fibrarum nimis crispatarum tensarumque dependet ille balneorum nostrorum in partium externarum *Contracturis*, *Ariduris*, *Tabe*, & *Spasmodica* quarumcunque *constrictione*, usus præstantissimus. Huic eidem debetur etiam *promotio*, & facilis atque frequens *exclusio*, tam *lapillorum* quam *sabuli nephritici*, atque etiam copiosi *muci*, non saltim in  
illis,



illis, qui nephritico - calculosis molestiis diu graviter vexati, verum etiam in aliis, qui de talibus ne cogitarunt quidquam, quippe nihil unquam passi, proin se quidquam fabulosi vel calculosi in corpore suo alere quovis pignore cum quocunque certaturi. Inde etiam derivari debet, quicquid in *Mensium* atque *Hæmorrhoidum* fluxus anomaliis corrigendis, suppressione vel imminutione restituenda, nimia profusione compescenda, dolorosis ac spasmodicis nixibus moderandis, atque tandem *Hysterico* vel *Hypochondriaco affectu* inde prognato mitigando valent.

§. XXVI.

Non enim reputandum est, externis modo partibus, earumque læsionibus, relinquenda esse balnea, ad affectus partium internarum, atque inprimis etiam superiorum, minime proficua. Incomparabilem profecto balneorum nostrorum utilitatem nostri deprehenderunt in iis morbis, ubi a vehementiori spasmō partium membranarum congestiones sanguinis ad partes quascunque alias fiunt, testimonio Cephalæ, Clavi Hysterici, & Hemicranæ, toties ab hisce nostris feliciter, si non penitus curatæ sublataque, tamen ad longum tempus quasi repressæ atque proscriptæ, vel tamen notabiliter mitigatæ. Relaxato quippe per balneum externo corporis habitu, & meatibus tenuioribus iterum apertis, non modo libertati suæ restituitur, & ad ambitum corporis evocatur sanguinis circulus, sed & perspiratione restituta ingens *impurarum sordium* per cutis cribrum fit *eductio*, adeoque materiæ acri, membranas nerveas tantopere vellicanti, atque atroces istos dolores aut spasmos excitanti,



tanti, conciliatur exitus. Dici vix potest quanta humorum saburra & colluvies mediante balneo per cutis emunctorium in aquas sæpe transeat. Fidem asserto faciet historia in *Misc. Nat. Cur. Dec. II. Ann. VI. Obs. 29.* a *Volckamero* recensita, qua constat, *fœminæ lumborum dolore crebro infestata*, non profuisse ullum, quod strenuam æque tulisset opem, quam aquæ dulcis balneum; sed *crassamentum pingue, copiosum, aqua innatans*, quotidie in labro fuisse deprehensum, facile cochlearis beneficio inde colligendum. Huic *Idem* in *Scholio* subjungit historiam *viri hypochondriaci*, etiam balneantis, cujus aqua tantum *fætorem* contraxerit, innatante ei *saburra nigricante crassa*, cum *acredine* semper crescente, ut quotidie novas subministrare herbas necesse fuerit, propter insignem *aquæ putredinem, gravemque odorem*, imo tantam *acerbitatem*, ut ministrantis atque assistentis manus vellicaret; Atque *Fœminæ*, quæ quotidie *fætentem* talem *colluviem*, *tres manuum volas æquantem*, ex corpore in balnei aquam emisit.

### §. XXVII.

Qua occasione non possum non ea, quæ inter generalia vel tribus supra tetigi, paulo specialius hic deducere, & in enarranda excellenti balneorum *efficacia* in *Affectione Hypochondriaca & Hysterica* aliquando liberalius calamo indulgere. Nullus fere ægrotorum est, qui plus auxilii & levaminis a nostrorum balneorum usu percipiat, quam viri *hypochondriaci*, & fœminæ *hystericis pathematibus* obnoxia, quod morbi genus & gravissimum & nostra ætate familiarissimum est, variis & atrocibus sæpe symptomatibus longo tempore, interdum absque

D

inter-



intervallo fere, non ægrotos exercens modo, sed & medicos mirum in modum fatigans.

§. XXVIII.

Quemadmodum vero e. g. mali hypochondriaci nondum adeo radicati & inveterati sedes primaria in ventriculo atque intestinis maxime hæret, quorum motus sic dictus peristalticus, qui secundum naturam in reciproca constrictione & dilatatione consistit, plane turbatus, imo nonnunquam inversus est, idque maxime per spasticas strictureas & crispaturas convulsivas, quibus si exercentur inferiores intestinorum, præsertim pleniorum, partes, non modo alvina excrementa detinentur, sed & flatulentia, exitu præcluso, versus superiora tendunt, intestina tenuia & ventriculum vehementer distendunt, partes vicinas, e. g. Lienem in sinistro hypochondrio, comprimunt, adeoque circulum sanguinis turbant, reliquas vero membranoso nervosas partes, imo quandoque totum fere systema nervosum, in consensum trahunt, ex quo tanta symptomatum calamitas, omnes fere corporis partes excrucians, oritur.

§. XXIX.

Ita passim quidem, sed simul & experientia multiplici conformiter, observavit *Illustr. Frid. Hoffmannus*, quod ad hunc morbum sublevandum, vel, si adhuc principium ejus fuerit, penitus eradicandum, non inveniatur præsentius remedium, quam in *recto thermarum & acicularum usu*; Prudenter tamen illud expressis verbis monens, quod talia modo *balnea* debeant seligi, quorum materia est *aqua pura, levis & subtilior*, adeo ut minerales aquas, quæ de graviori terreo salino, vel etiam ad-

strin-



stringente martiali elemento multum participant, huc non æque spectare, neque tantam istis utilitatem afferre, fateatur. Confirmaturus hanc thesin suam, provocat ad multiplicem in *Thermis Carolinis*, uti ab Ipso non semel factam, sic ab Aliis non minus repetendam experientiam, qua constet, scaturiginem ordinariam, alias pro principali habitam, externe minus feliciter hypochondriacis suaderi, quia graviores & magis constringentes aquas habeat; Dum contra loco ejus feliciori cum successu suis suaserit balneum ex aqua altera subtiliori, quæ vocatur *das Mühlen-Wasser*. Licebit tamen in transitu *Cautelam*, a *B. Volckamero* loc. cit. ad omnia omnino balnea præscriptam, etiam hypochondriacis observandam commendare. Illa autem paucis hæc est: *In omnibus balneis in fronte sudor terminus esto, quem si transiveris, periculis vacuus non eris.*

### §. XXX.

Meum quidem non est, neque vel temporis vel instituti mei ratio permittit, præconem agere utriusque nostri balnei, & prolixius recensere morbos omnes atque singulos, quibus thermas nostras, utpote admodum proficuas, nec sine fructu unquam usurpandas, commendare liceret. Sed nec opus est vino jam dum bene vendibili suspensa tali hedera. Ego paraturus disputationi materiam, unum saltem atque alterum morbum paulo specialius considerabo, & de proficuo thermarum in illis usu pauca subjungam. Singulari autem quasi jure quodam suo primum inter istos locum utique sibi vindicat *Paresis*, relicta a *Colica*, de qua paucis notare liceat seqq: Qui sub finem IV. vel principium V. a Salvatore seculi inter



Medicos Græcos claruit, *Paul. Ægineta*, in Tr. suo de Re Medica miratus est, dari speciem *Colicæ* tum adhuc novam, *Epilepsia* & *Paralysi* subsequenter gravem, nec modo ordinario per calida, sed per frigida curandam, adeoque prorsus singularem. Hæc resolutio artuum post colicam posteris vocata fuit *Paresis*, & venisse observata toties, quoties vel a vino per colicam non abstinuisse, vel purgantibus curare se voluisse convinci poterat ægrotus; Sicuti etiam colica ipsa in se, quoad causam suam, tandem Avorum nostrorum tempore detecta fuit inprimis *Saturnina*, *Plumbea*. Præter tamen allegatam modo causam geminam, insuper hoc notatu dignum non semel observatum fuit phænomenon: Sc. Colicos in media dolorum atrociam, balneo aquæ dulcis immersos, a doloribus colicis quidem ita fuisse liberatos, sed artubus suis resolutos, adeoque factos inde *Pareticos*.

§. XXXI.

Neque vero una eademque semper fuit omnium *Pareticorum* conditio. Quibusdam dolores colici manserunt diu superstites, apud alios cito penitus evanescentes; *Pareticorum* quorundam artus erant vere resoluti, flaccidi, aliorum obrigescerent & magis contracti; Ipsa hæc obrigescencia non erat omnibus promiscue indolens, sed quibusdam simul admodum dolorosa, modo quasi arthritico fixo; Quemadmodum ipsi hi dolores de sensibilitate partis superstite satis utique testabantur in articulorum rigiditate: Sic eadem sensus ἀκρίβεια fuit etiam in illis quasi paralyticis vere talibus, adeo ut vel singulas pulicum puncturas accurate senserint. Aliqui *Pareticorum* cœperunt intumescere, adeoque in cachexiam tran-



transire, alii vero & longe quidem plures notati fuerunt tabescere, consumi, plerisque omnibus quasi ictericiam in facie flavedinem simul exhibentibus, & prurientem frequenter cutem fricare solitis.

§. XXXII.

De hisce tantum non omnibus & singulis in genere, multiplici nixus experientia, pronunciare non vereor: *Paresis curatur balneo in thermis ferinis.* Utut forte non semper statim in ipso, certe tamen post usum ejus, & per ipsum. Non vacat hic prolixam dare pareticos ætiologiam, etiamsi inquisitionem mereretur & discussionem hæc inprimis quæstio: *Qua ratione cum colica permutetur Paresis?* An ad consensum modo nervorum, anne vero ad metastasin causa ex intestinis & mesenterio ad artus, referri debeat? Sufficiat ex Disputat. d. Spasm. Intest. Inaugurali quondam Exc. Dn. Præsidis mei, *Illustr. Dn. D. Zelleri Promotoris aeternum venerationis* paucis huc transcribere sequentia: *Non quidem eam quæ in intestinis hæret, sed eam quæ in itinere ad intestina est, ad artus effundi eleganter ac sufficienter probat D. D. Mezgerus Disp. de circulo sanguinis III.* Cui subjungi possent & conferri utique merentur, quæ prostant in B. Dn. D. Rud. Jac. Camerarii *Diss. de Colica Paretico Epileptica. §. XII.* Neque alteram non minus curiosam quæstionem therapeutica hic tractabo: Cum effectus balnei ad sedandos colicæ dolores sit æque certus, ac ille alter thermarum ferinarum ad restituentiam pareticorum artubus libertatem, *annon*, ut cito curemus & jucunde, sepositis modo dictis omnibus, *præstet balneo colicum immittere, atque adeo abbreviare ipsi torturam, in quintum, sextum vel septimum diem alias protrahen-*



*hendam.* Certe adeo lætari *Erastus* notavit ægros, cum se ab immanibus cruciatibus liberatos sentiunt, ut resolutionem artuum ducant pro nihilo; quanto magis, si hanc adeo facile ferinis abigendam nostri resciverint. *Carolus Piso* tamen balneis hunc effectum inducendi *parēs* denegat, omne illud, quicquid est vel paralyseos vel contracturæ, *non ab usu balnei, sed a vi morbi derivans.*

### §. XXXIII.

Hanc vero quæstionem me vix declinare posse sentio: *Num thermis ferinis sit hac prerogativa solis?* Quid promitti possit ægris de *Zellensibus*, etiam nostræ nunc considerationis? Imo quid de balneo in *Acidulis Deinacensibus*, quas pro potu ipsis adhuc colicis alias concedere solent nostri Medici? Aut quid valiturum, in casu e. g. necessitatis vel indigentia, balneum vicinum *Blasianum*, vel aliud quodcunque? De Ferinis quidem thermis res est in vulgus nota, & multiplici ut dictum experientia confirmata, earundemque facultates & qualitates etiam ita comparatæ, ut in eminenti utique gradu hoc mereantur prædicatum. Non ausim tamen privative hoc accipere, & ferinis solis vindicare. Quod enim *Zellenses* quidem concernit, constat ex superioribus, & dicemus adhuc in sequentibus, quam in multis illæ convenient cum ferinis, uti ratione constitutionis naturalis, sic etiam in ordine ad virtutes medicas, præcipue ad articulorum affectus. Et habemus utique historias etiam Pareticorum, ad has felici cum successu ablegatorum. Pro balneo ex *Acidulis Deinacensibus* parando militat inprimis, quod in *Hydrophylacio* suo urget *Vicarius*, balnea vitriolacea ex acidulis



acidulis parata esse ad curandam paresin aptiora. Transeat hic ꝓ Vitriolaceum stricte sumtum, quippe quod in acidulis non deprehendi, gratis huc usque in illis quæsitum vel prætensum fuisse, præter alios multos, dudum docuit inprimis Illustr. Hoffmannus. Balneorum tamen usus in ipsis nostris Deinacensibus quotannis fere fit frequentior, & extenditur ad affectus etiam alios, Ferinis vel Zellenensibus quondam unice reservatos. Denique ex Disp. laud. d. *Balneo Blasiano* novimus, & in hoc ipso pareticam graviter talem, feliciter tamen fuisse restitutam, ut digitos modo rigidos, & distortos aliquandiu servaverit: (At vero hoc etiam in ferinis observatur, & extremi digitorum articuli ultimo demum loco mobilitatem recuperant pristinam.) Et paretico pauperculo egregie profuisse *balneum aquæ simplicis*, cum incocto cortice Betulæ paratum, liberatum enim hunc fuisse provocata cito gravi scabie.

§. XXXIV.

Tales autem Pareticos cum *Paralyticis* non esse confundendos, & exempla illorum per thermas curatorum non esse alleganda & divulganda pro his vere paralyticorum, quemadmodum prudenter monuit *Lamzwerde* in d. *Therm. Abusu*; Sic ab ipso hoc inæquali successu, tanquam argumento a posteriori, constat, gravius omnino laborare hos quam illos. Occasione Disputationis alicujus nuperæ in *Histor. Morb. Vratislaviensium* aliquid evolvens, opportune etiam incidi in ea, quæ de thermis erudite differunt ibi Collectores, & legi, quam feliciter in *Landecanis aquis* restitutus fuerit *ab hemiplexia paralyticus* plethoricus; ut subjungant etiam, se nescire, quo jure



jure concludere potuerit *Lamzwerde*, quod thermarum balnea non sint conveniens paralyticorum medicina. Novi etiam, apud *Lancisium d. Mort. Subitan.* in curatione paralyseos occurrere balneum; Et *Helvetio* magnopere laudari duo Galliae balnea, ad curandas & abigendas apoplexiæ reliquias paralyticas.

### §. XXXV.

Quid quod præcipuum est, atque omnes rationes & analogismos medicos superat, mihi quoque suppetunt *exempla talium, ab apoplexia paralyticorum, ad ferinas nostras felici cum successu profectorum.* Habe Chirurgum Argentoratensem, *hemiplecticum, & graviter balbutientem*, atque insuper *pedibus jam tumescentem*, cum *dyspnæa & tussi*: Et mirare, huic, provide instituta cura, non modo *evanuisse tumorem pedum, & cessasse tussim*, promota expectoratione facili; verum etiam *loquelam rediisse atque motum*, ut satis commode iterum potuerit *ambulare & loqui*, proin felix patriam repetere. Junge huic Cauponem *Sexagenarium*, qui *paralysin* suam *hemiplecticam* similiter *profligavit* feliciter, & in tertium jam lustrum quotannis rediit, languorem annum ibidem curaturus. Poterat autem hic ipse *septimo jam die* suis iterum sese vestibis induere, *decimo tertio die* domum *eques* petere, sinistro latere, cum thermas accederet, plenarie resolutus, atque rheda ob id advectus. Adde, si placet, tertiam, *juvenculam*, adeo resolutam, ut *fere penitus obmutuerit*. Certe etiam hæc & *ambulandi & loquendi potentiam* feliciter in thermis ferinis recuperavit.

### §. XXXVI.



§. XXXVI.

Verum enim vero, si quod res est loqui & ingenue fateri licet, pauci quippe boni sunt, & digitis adhuc forsan numerari possunt, quibus contigit esse adeo felicibus & curari in balneis a vera paralyfi apoplectica. Nec desunt exempla in contrarium aliorum, qui *nihil prorsus adjuti iterum discesserunt*, oleum atque operam perdetes omnem, a quorum recessione brevitatis studio abstinemus. Etenim duo inprimis sunt, quæ dubium semper tenent animum: Primum est, quod paralyfis illa veniat culpa non membri, vel articuli, quoad fibras suas motrices musculares, imo nec nervi ipsius in illo suo progressu, vel termino; unde etiam inunctiones omnes atque illinitiones externarum istarum partium maximam partem sunt frustraneæ; Sed culpa hæret in meditullio cerebri, circa medullam oblongatam, adeoque nervorum originem, non terminum; quorsum proin non æque penetrat vis balnei, nisi forsan commovendo sanguinem, & excitando motum ejus, tam intestinum quam progressivum. At vero hoc ipsum illud alterum est, a quo sibi metuunt tantopere; Scil. ne afflicto nuper, & infirmo hac usque, capiti forte concitetur recidiva, & invitetur insultus novus, forsan priore fortior, quia jam dum natura solet pristinas affectare vias, & partes sequi, uti fere Logicorum conclusiones solent, debiliores, utut vel maxime hoc foret aliquid, quo quilibet egregie vellet, si modo posset, carere.

§. XXXVII.

Supereft tamen alia adhuc artuum infirmitas, & plenaria quandoque movendi impotentia, cui salutariter & cum fructu opponuntur balnea nostra, tam Ferinarum

E

quam



quam Zellenfium. *Arthriticos* intelligo, illisque jungo omnes illos, qui ab *Ifchiade*, *Podagra*, *Rheumatismo* & similibus morbis, vel infirmi saltim & plus minus debilitati, vel etiam in graviore casu obrigescentibus articulis, vel quasi paralytice resolutis, *movendi potentia prorsus destituti* sunt; quibus ad latus pono, brevitatis studio, earundem partium *dolores*, atque tandem *tumores* ab istis remanentes. Omnium atque singulorum horum specimina possemus producere quam plurima, cum fere maxima balneantium pars ad hanc morborum classem, instituto advenarum examine, deprehendatur referenda, ut ad *Grallas* etiam, tanquam devicti morbi trophæa, provocare cum *Willisio* liceret.

#### §. XXXVIII.

Occasione autem hujus ipsius articuli unum atque alterum specialius notari meretur. Primo de *Podagra* fateor ingenue, me non in ea opinione esse, ac si vel *Ferina* vel *Zellenfes* aquæ podagram curarent, ita, ut de non amplius redeundo spondere quidquam, vel cavere quisquam possit. Amat ista periodos, & redibit certo certius, citius sive tardius, si quem semel civitate donavit vel ordini adscripsit suo, nisi quidem medicatione incongrua male tractata graviozem mittat hostem, vel decumbat in partes interiores, adeoque tanto nobiliores, quippe principes. Nec diffiteor, esse etiam ex podagricis, qui ne ad *demulcendas* quidem *Podagræ molestias tuto* mixtuntur in balnea, quibus caput debile, vertiginosum, tremulam graviora minatur, proin apoplexiæ metus non vanus est. Adeoque de uno saltim paroxysmo ejusque molestiis, imo reliquiis, intelligendum est, quod in laudem balneorum hoc respectu passim scribitur.

#### §. XXXIX.



§. XXXIX.

Interim tamen mirabundus certe animadverto insignem hic recessum Medicinæ recentioris, ab antiqua praxi & traditione populari, qua prætenditur, *erysipelas* atque similes ejusmodi *tumores*, vulgo *calidos* dictos, proprie & medice inflammatorios, *non esse humectandos*, ad minimum non aqueis, sed spirituosius modo tractandos. Cum tamen in nostris utrinque thermis suppetant exempla non paucorum, qui non modo *erysipelate*, & olim sæpius & *jamdum* graviter, *affecti balneare* tamen pergunt audacter, atque inflammationem omnem abigunt hac ratione feliciter; verum etiam in *medio podagræ paroxysmo balneo se committere* eamque hoc modo curare præsumunt. Quemadmodum id, quod patitur articulus in paroxysmo vel podagrico, vel arthritico, aut ischiadico, quantumvis cæteroquin vel maxime dolorifico, inflammatio utique est, naturæ erysipelaceæ, adeo, ut *Mortonus* etiam e. g. Arthritidem vocaverit febrem inflammatoriam universalem rhevmaticam, cum inflammatione versatili, variolis atque morbillis eam subjungens; Sic ulteriori etiam aliorum inquisitione digna utique sunt exempla talia paradoxa illorum, qui in ipso medio vel arthritidis vel podagræ paroxysmo, tamen balneo se committere ausi, eoque non minus felici cum successu usi, quippe ab omni isto paroxysmo, ejusque molestiis cito æque atque tuto, proin etiam jucunde, liberati sunt.

§. XL.

Dignum hoc jam suo quondam tempore judicavit *B. D. E. R. Camerarius*, quod notaret in *disput. sua d. Acidulis III. sc. earundem usu externo*; In hujus enim §. V. non modo *Erysipelas balneo aquarum Deinacensium* feliciter curatum  
 &



& præservatum ex *Gabelchoveri Obs. Cent. III. cur. 12.* allegatur, atque ex ejusdem annot. ad cur. 74. Cent. II. subjunguntur verba seqq. *Vidi quendam a collo usque ad umbilicum maximo & ferventissimo erysipelate correptum in aciculas Deinacenses se immeruisse, in iisque non solum ardoris contemperationem, verum etiam integram sanitatem consecutum fuisse, multis Idiotarum summopere mirantibus, qui madorem quemcunque cane pejus & angue oderunt.*, Verum etiam de *Arthritide, Podagra & Ischiade* eadem prorsus recensentur, autoritatibus *Greiselii, Horstii* aliorumque probantur, atque tandem propria *Præsidis* quoad postremum quidem experientia confirmantur.

§. XLI.

Quanquam ergo hac ratione podagricis non expectandum foret amplius ad quadragesimam illam medicam, ab *Hippocrate* in *Secl. VI. aph. 49.* assignatam, atque balneis cito admodum expediri præsumant tales, unicum tamen *Coronidis* loco subungere mihi liceat. Quam ex una parte affectibus modo dictis juncta febris intensior thermarum usum nihilominus reddit suspectum, scil. durante adhuc paroxysmo suscipiendum, non reliquiis & infirmitati membrorum destinatum; Tam ex altera parte Medicum juvenem reddunt dubium adeo diversa, uni tamen eidemque morbo destinata ac tantopere commendata, diversorum Medicorum remedia, Scil. obversantur animo non saltim *Hippocr. Aph. 23. atque 25. Secl. V.* verum etiam laud. prius *Gabelchoveri H. U. v. W. Kunst wider das Podagra*; atque integer tractatus *Floyeri de balneo aquæ frigida*; ut non immerito quandoque instituenda & prudentiæ medicæ commendanda videatur etiam hæc deliberatio practica: *Quandonam consultius sit balneo uti vel calido vel frigido?*

Sed nunc vela tandem scriptionis contraho, devotissimas Deo T. O. M. agens gratias, quod sua Gratia huc usque mihi voluerit adesse, atque studia mea Academica dirigere ad exoptatam huncce

F I N E M